



## CONVENIO DE COLABORACIÓN ENTRE O CONCELLO DE VIGO E A UNIVERSIDADE DE VIGO PARA O IMPULSO DA CANDIDATURA DAS ILLAS CÍES COMO PATRIMONIO MUNDIAL UNESCO

Na Casa do Concello de Vigo, a vinte e oito de xullo de dous mil dezasete

### REUNIDOS

Dunha parte, D. Abel Caballero Álvarez, Alcalde de Vigo, designado na sesión do Pleno da Corporación do día 13 de xuño de 2015, e que actúa en representación do Concello de acordo aos artigo 124.4 a) da Lei 7/1985, do 2 de abril, de bases de réxime local (en adiante LRBRL) e o artigo 61.1 a) da Lei 5/1997, do 22 de xullo, de administración local de Galicia (en adiante LALGA).

Doutra, D. Salustiano Mato de la Iglesia, Reitor Magnífico da Universidade de Vigo, nomeado segundo Decreto da Comunidade Autónoma de Galicia núm. 47/2014, do 24 de abril (DOG núm. 79, do 25.04.2014), de acordo coas competencias que lle outorga o artigo 20 da Lei Orgánica 6/2001, do 21 de decembro, de Universidades e o artigo 58 dos Estatutos da Universidade de Vigo, aprobados polo Decreto 7/2010, do 14 de xaneiro (DOG núm. 21, do 02.02.2010 e BOE núm. 69, do 20.03.2010).

Ambas partes recoñécense mutuamente capacidade legal suficiente para subscribir o outorgamento do presente convenio e

### EXPOÑEN

I. Os municipios, para a xestión dos seus intereses e no ámbito das súas competencias, poden promover actividades e prestar servizos públicos que contribúan a satisfacer as necesidades e aspiracións da comunidade veciñal, segundo o previsto no artigo 25 da Lei 7/1985, do 2 de abril, reguladora das bases de réxime local (LRBRL).

O artigo 25.2. h) da Lei 7/1985, reguladora das Bases de Réxime Local atribúe ás administracións locais competencia en materia de información e promoción da actividade turística de interese e ámbito local. Asemade a Lei 5/1997, de Administración Local de Galicia, no seu artigo 80.2. n) regula como unha competencia local a xestión de actividades culturais e a ocupación do tempo libre e o turismo.

A Lei 27/2013, do 27 de decembro, de racionalización e sustentabilidade da Administración Local, dispón que as competencias atribuídas ás entidades locais pola lexislación autonómica anterior á entrada en vigor da citada Lei (este é o caso, en canto o artigo 80.2 da Lei 5/1997, de Administración Local de Galicia, atribúe aos concellos como competencia propia na letra "n", a xestión de





actividades culturais e de ocupación do tempo libre e o turismo), continuarán exercéndoas elas, rexéndose pola indicada lexislación.

II. Pola súa parte, a Universidade de Vigo á luz do establecido no art. 2.2. j) da Lei Orgánica de Universidades e no art. 58 dos seus estatutos, ten entre as súas competencias o establecemento de relacións académicas, culturais ou científicas, con entidades e institucións nacionais e internacionais, para a promoción e desenvolvemento dos seus fins institucionais.

Asemade, o Concello de Vigo e a Universidade de Vigo asinaron 1 de marzo de 1996 un Acordo Marco de Colaboración co obxecto de instrumentar e regular as súas relacións de colaboración e cooperación mutua, mediante a eventual subscripción de convenios específicos en cada caso.

A cláusula segunda do dito convenio establece que o propósito do acordo é o de realizar actividades e proxectos de forma conxunta entre ámbalas dúas institucións. Pola súa parte, a cláusula sexta do dito convenio establece que “cada un dos programas concretos de colaboración entre ámbalas dúas partes requirirá a elaboración dun convenio específico (...)”.

III. O Concello de Vigo na súa aposta e compromiso pola conservación, protección e promoción turística e medio ambiental sostible das Illas Cíes, que se atopan no termo municipal de Vigo, promove e lidera a proposta de candidatura do arquipélago como Patrimonio Mundial Natural UNESCO.

A inscrición deste ben na Lista de Patrimonio Mundial presenta, entre outras moitas, as seguintes vantaxes:

- Confírelle á comunidade local a posibilidade de celebrar o ben como un dos sitios naturais máis importantes do mundo, coa promoción que iso supón para un dos principais símbolos da cidade de Vigo.
- Converte o ben nun emblema para a rede nacional de áreas e sitios protexidos, propiciando un maior e mellor recoñecemento e unha mellor protección do patrimonio natural.
- Estimula a cooperación de todas as administracións en favor da protección do ben.
- Ofrece a posibilidade de mobilizar fondos e apoio para a conservación e preservación do ben, especialmente, do Fondo Patrimonio Mundial.
- Permite difundir técnicas e prácticas de protección, conservación e xestión do ben.

Nesta firme aposta, dende o Concello de Vigo trabállase formalmente dende o ano 2013 no deseño e desenvolvemento dunha estratexia de candidatura, cun enfoque fortemente participativo.

A estratexia artéllase en tres liñas de traballo fundamentais, baixo as que se agrupan diversas accións que foron deseñadas para a súa posta en marcha no





período temporal que, finalmente, ocupe esta iniciativa e que pretende culminar coa inscrición das Illas Cíes como Ben Patrimonio Mundial Natural UNESCO.

Os tres eixos da estratexia de candidatura nesta fase, seguindo as Directrices Prácticas para a aplicación da Convención UNESCO, son as seguintes:

- **Coordinación e colaboración institucional:** co ánimo de conseguir o recoñecemento, implicación e traballo colaborativo entre institucións e representantes políticos do ámbito local, rexional, nacional e internacional, que reforcen e posicionen a candidatura das Illas Cíes.
- **Divulgación e busca de apoios á candidatura:** é preciso conseguir o maior número de apoios, implicacións e participación activa da sociedade e do ámbito empresarial, académico, científico, institucional a prol da candidatura.
- **Reforzo científico-técnico do expediente de candidatura:** ao longo de todo o proceso de candidatura levaranse a cabo accións que proporcionen á candidatura o requirido vigor científico, baixo o que quede perfectamente xustificado o cumprimento dos criterios específicos UNESCO cos que se pretende concorrer.

IV. É importante contar ao longo do proceso de candidatura co asesoramento e colaboración da comunidade científica, de modo que se poida garantir a achega dos coñecemento e competencias que abarquen os diversos valores do ben.

V. O presente convenio de colaboración entre o Concello de Vigo e a Universidade de Vigo enmárcase na necesidade de traballar conxuntamente no desenvolvemento das accións incluídas na terceira liña de traballo antes exposta, de reforzo científico-técnico do expediente de candidatura

VI. A Universidade de Vigo e, concretamente, o Campus de Excelencia Internacional "Campus do Mar", na súa calidade de aglutinador das capacidades docentes e investigadoras da Eurorrexión Galicia-Norte de Portugal, vinculados co ámbito marítimo, preséntase como a entidade idónea para a colaboración co Concello de Vigo no reforzo científico-técnico da candidatura das Illas Cíes como Patrimonio Mundial Natural UNESCO.

Concretamente, o Campus de Excelencia Internacional "Campus do Mar", liderado pola Universidade de Vigo, é a agregación das tres universidades de Galicia (Universidades da Coruña, Santiago de Compostela e Vigo), o Consello Superior de Investigación Científica (CSIC), o Instituto Español de Oceanografía (IEO), as universidades do Norte de Portugal (Universidades de Porto, Minho e Tras os Montes e Alto Douro), a Universidade de Aveiro, Institutos Politécnicos (IPL de Leiría e IPL de Viana do Castelo), así como os centros de investigación e plataformas tecnolóxicas da Eurorrexión para desenvolver un campus de excelencia en Ciencias e Tecnoloxías do Mar con implantación ao longo do noroeste peninsular e con proxección internacional.





O Campus do Mar tamén incide na importancia que está adquirindo o turismo e o ocio relacionados co mar, actividades fortemente implantadas na Eurorrexión. A propia riqueza dos ecosistemas mariños da rexión e das súas infraestruturas marítimas fan da área cuberta pola agregación estratéxica que compón o Campus do Mar un lugar idóneo para o desenvolvemento deste proxecto.

VII. Dada a dimensión internacional do proxecto de candidatura das Illas Cíes como Patrimonio Mundial UNESCO, ambas institucións expresan o seu compromiso de establecer unha colaboración nos campos científico e técnico a prol da dita candidatura, de interese común, porque entenden que esta colaboración mellorará a eficiencia da xestión pública, facilita a utilización conxunta de medios e servizos e contribúe á realización deste proxecto de utilidade pública e transcendencia internacional.

VIII. Ambas institucións consideran que a candidatura ten un interese público e social, tanto por ser liderado polo Concello de Vigo, onde se atopan as illas, como polo enfoque dado ao proxecto, que conxuga o obxectivo de promoción e conservación do ben co desenvolvemento turístico e medioambiental sostible.

IX. O Concello de Vigo e a Universidade de Vigo consideran que a inscrición na Lista de Patrimonio Mundial terá numerosos efectos positivos para o ben en concreto e para a cidade de Vigo e a súa contorna, sumando valor engadido á toda a Eurorrexión. Un recoñecemento internacional de enorme prestixio e transcendencia, que contribuirá á posta en valor e á promoción das Illas Cíes como un ben natural cun Valor Universal Excepcional (VUE).

X. Toda vez que o artigo 47.1 da Lei 40/2015, do 1 de outubro, do réxime xurídico do sector público, establece que o convenio é o instrumento con efectos xurídicos que asinan as administracións públicas, os organismos públicos e entidades de dereito público ou as universidades públicas entre si ou con suxeitos de dereito privado para a consecución dun fin común, conclúen o presente convenio ao fin de regular os termos da colaboración antedita con arranxo aos seguintes

## PACTOS

**Primeiro.-** A UNIVERSIDADE DE VIGO (CAMPUS DO MAR) comprométese a:

1º Coordinar o Comité Científico da candidatura Illas Cíes Patrimonio Mundial UNESCO

2º Validar cientificamente as accións que se deseñen e desenvolvan no marco da candidatura

3º Colaborar na xustificación científica sobre a que se asenta o cumprimento dos criterios UNESCO das Illas Cíes para ser declaradas Patrimonio Mundial

4º Colaborar no desenvolvemento do argumentario dos conceptos transversais da





candidatura de Valor Universal Excepcional e Integridade

5º Orientar e asesorar na determinación de novas accións e liñas de investigación a desenvolver, que proporcionen o adecuado rigor científico ao cumprimento dos criterios UNESCO, co fin de resolver posibles nichos de xustificación científica-técnica

6º Apoiar no deseño e desenvolvemento de estratexias que promovan a execución de estudos científico-técnicos que reforcen o coñecemento das Illas Cíes e a súa contorna, no marco de Traballos Fin de Carreira e/ou o establecemento de prácticas reguladas nos programas de Grao Universitarios de que se compón o Campus do Mar.

7º Colaborar no deseño e organización de actuacións de difusión científico-técnica da candidatura

8º Difundir as accións, fomentando o maior índice de participación académica e científica posible en torno á candidatura

9º Facilitar os medios precisos para a inserción da imaxe institucional da Universidade de Vigo e, nomeadamente, do Campus do Mar nos ámbitos de divulgación das accións que se leven a cabo

10º Calquera outra liña de traballo que se poida sumar ás anteriores e que supoñan o fornecemento da candidatura

**Segundo.-** O CONCELLO DE VIGO, pola súa parte, comprométese a:

1º Coordinar a equipa de traballo da candidatura das Illas Cíes como Patrimonio Mundial UNESCO

2º Coordinar a interrelación dos comités técnico, científico e socio-económico

3º Aprobar e validar todas as accións que sexan deseñadas no ámbito do reforzo científico-técnico da candidatura

4º Constituír, co asesoramento da Universidade de Vigo, as mesas de traballo específicas que se consideren precisas

5º Dinamizar as ditas mesas técnicas e recopilación e elaboración do traballo resultante para a súa validación científica por parte da Universidade de Vigo

6º Supervisar as actuacións que se aproben conxuntamente, no marco do fornecemento científico da candidatura

7º Difundir as accións, tanto a nivel interno como externo, fomentando a creación de masa crítica e un alto índice de participación





8º Facilitar os medios necesarios para a inserción da imaxe institucional do Concello de Vigo e da imaxe da candidatura nas accións de divulgación que realice a Universidade de Vigo neste marco

**Terceiro.-** Presidencia do Comité Científico da candidatura

A presidencia do Comité Científico da Candidatura recaerá nun investigador ou investigadora da Universidade de Vigo, designado ou designada de común acordo entre as partes.

**Cuarto.-** Obrigas e compromisos económicos

A colaboración entre o Concello de Vigo e a Universidade de Vigo, non suporá ningún gasto e, polo tanto, as partes non adquiren ningún compromiso financeiro. O obxecto principal do convenio de colaboración é o de facilitar a utilización conxunta de medios e servizos públicos, mellorando a eficiencia da xestión pública e facilitando a realización de actividades de utilidade pública.

O asesoramento e a colaboración da Universidade de Vigo no deseño das accións a desenvolver, así como na validación científica dos traballos que se realicen carece de impacto económico, xa que non se adquiren obrigas nin compromisos de carácter económico por ningunha das dúas partes. Asemade, as actuacións que se contemplan no convenio e que se prevén executar en favor da candidatura das Illas Cíes non teñen carácter contractual.

**Quinto.-** Vixencia

A vixencia do presente convenio abrangue o período comprendido entre a sinatura do mesmo, unha vez aprobado polos respectivos órganos de goberno competentes e ata a finalización do proceso de elaboración do expediente técnico definitivo de candidatura, sempre dentro dos prazos máximos fixados polo artigo 49.1 e 2 da Lei 40/2015, do 1 de outubro, de réxime xurídico do Sector Público.

**Sexto.-** Seguimento, vixilancia e control de execución do convenio

No prazo de 10 días dende a sinatura do convenio establecerase unha comisión de seguimento de carácter paritario, composta por un representante designado por cada unha das partes, que periodicamente avaliarán o desenvolvemento do convenio, interpretando e resolvendo as dúbidas que se desprendan do mesmo e que aprobarán, no seu caso, as modificacións na realización do traballo que por causas non previstas fora necesario introducir, que non afecten a partes esencial. A dita comisión poderá invitar as reunións a aquelas persoas que se estimen pertinentes, con voz pero sen voto, aos efectos de asesoramento específico sobre calquera materia obxecto do presente convenio.





A Comisión reunirse, cando menos, unha vez ao mes, durante a vixencia do convenio. A dita Comisión poderá actuar ben mediante reunións presenciais, elevándose as correspondentes actas, ou polos medios telemáticos e/ou electrónicos oportunos.

A Comisión será a encargada de determinar e impulsar as accións específicas que permitan a máxima colaboración entre ambas institucións, cos obxectivos xa indicados.

### **Sétimo.-** Extinción

O presente convenio poderá resolverse por calquera das causas previstas no artigo 51 da Lei 40/2015, do 1 de outubro, de réxime xurídico do Sector Público, se ben as partes conveñen que as actividades ou traballos específicos que se estiveran desenvolvendo no momento da denuncia do convenio, continuarán desenvolvéndose ata a súa total conclusión baixo as bases que orixinariamente se acordaran.

### **Oitavo.-** Réxime xurídico e xurisdición

O presente convenio ten a natureza dos previstos no artigo 4.1. c) do Real Decreto Legislativo 3/2011, do 14 de novembro, polo que se aproba o texto refundido da Lei de contratos do sector público, polo que queda fóra do seu ámbito de aplicación.

Este convenio de colaboración rexerese polas súas propias cláusulas e, supletoriamente, polas normas xerais do dereito administrativo.

As cuestións litixiosas a que poida dar lugar a interpretación, modificación, efectos ou resolución do contido do presente convenio específico de colaboración que non foran resoltas pola comisión de seguimento prevista no pacto quinto do convenio, someteranse á xurisdición contencioso-administrativa, de conformidade co disposto na Lei 29/1998, de 13 de xullo, reguladora da citada xurisdición.

### **Noveno.-** Confidencialidade

Ambas as partes comprométense a cumprir e facer cumprir o deber de segredo profesional e de confidencialidade, que abranguerá calquera información ou dato que se puidese coñecer con ocasión desta colaboración.

Os datos dos informes ou documentos, así como os resultados finais das mesas de traballo da candidatura ou calquera información derivada do proxecto terán carácter confidencial.



Cada unha das partes que pretenda utilizar os resultados parciais ou finais, en parte ou na súa totalidade, para a súa publicación como artigo, conferencia, congreso, etc. deberá solicitar a conformidade da outra parte por escrito. Calquera que sexa o modo de difusión, respectarase sempre a mención dos autores ou autoras do traballo en cuestión e farase expresa mención ao presente convenio, figurando as dúas institucións asinantes do presente convenio.

E, en proba de conformidade, asinan o presente convenio, por triplicado exemplar, en Vigo, 28 de xullo de 2017.

Pola Universidade de Vigo  
O Reitor



Salustiano Mato de la Iglesia

Polo Concello de Vigo  
O Alcalde



Abel Caballero Álvarez